



L'impressari sursilvan Daniel Blumenthal crititgescha la reacziun dal mainafatschenta da l'Uniun grischuna d'artisanadi e mastergn sin il resultat da votaziun da la fin da l'emna. FOTO O. ITEM

Segn da protest

Il deputà sursilvan Daniel Blumenthal ha abdicà sco suprastant da l'Uniun grischuna d'artisanadi e mastergn

DAD ANDREAS CADONAU / ANR

■ **L'impressari e deputà Daniel Blumenthal ha renunzià al commemoradi da l'Uniun grischuna da mastergn ed è sorti da la suprastanza. En consequenza da la parola da gea da l'uniun dals mastergners grischuns vers l'iniziativa No-Billag. Malgrà il cler verdict dal suveran grischun da la fin d'emna passada defenda il mainagestiu da l'uniun, Jürg Michel, la parola, vul dentant tuttina analisar l'agir da la suprastanza da l'Uniun grischuna d'artisanadi e mastergn.** «Sa chapescha che nus reflectain nossa strategia, quai avain nus era fatg a chaschun dal na dal suveran grischun avant in onn en chausa candidatura per ils Gieus olimpics.» Il mainagestiu da l'Uniun grischuna dad artisanadi e mastergn, *Jürg Michel*, conceda ch'il na dal suveran grischun vers ina candidatura per Gieus olimpics haja fatg ad el in buntant pli mal ch'il na dal suveran grischun vers l'iniziativa No-Billag da la fin da l'emna passada. Reflectà l'atgna strategia ha er il commember da la suprastanza da l'Uniun grischuna d'artisanadi e mastergn, *Daniel Blumenthal*. El ha abdicà sco suprastant ed è sorti da l'uniun en consequenza da la parola da votaziun da l'uniun pro l'iniziativa No-Billag. Il deputà lumnezian è stà talmain trumpà da la suprastanza da l'uniun tergala dal mastergn grischun en connex cun la parola da votaziun. Blumenthal è interprendider e represchenta la

Surselva er en la suprastanza da l'Uniun grischuna dals impressaris. Ulteriura fadia ha il deputà lumnezian cun las explicaziuns dal mainafatschenta Jürg Michel fatgas il di da votaziun en enconuschientscha dal resultat. «Co san ins en enconuschientscha dad in tal resultat pretender che quel saja vegnì a strada cun squitsch e far tema?» Blumenthal sa dumonda schizunt sche Michel saja il dretg mainafatschenta per l'Uniun grischuna d'artisanadi e mastergn.

Pront per ina bilantscha

Michel ha menziunà ch'el saja anc dus onns e mez en uffizi e silsuenter sa chapescha pront per ina bilantscha pertutgant ses engaschi en favur da l'uniun. Michel defenda la parola da la suprastanza da l'uniun che saja crudada fitg stretg e valitescha ella sco consequenta per ina uniun che s'engaschia cunter pli autas taxas. El rinfatscha a las medias da nun avair rapportà exact las cifras dals manaschis pertutgads da nov da las taxas da radio e televisiun. Dals 18 000 manaschis grischuns da tut ils trais secturs sajan 4140 suttamess a la taxa. Bliers manaschis commembers da sia uniun. Tuttina conceda Michel ch'i haja dà buns arguments cunter No-Billag e sia uniun haja preni la decisiun da parola bainsavend che la votaziun na saja betg da dumagnar. Il mainafatschenta conceda dentant che la parola haja dà bles da discutir er entaifer l'agen commembradi. Il protest saja ve-

gnì principalmain da commembers da la Surselva e da l'Engiadina Bassa. Da l'abdicaziun da Blumenthal ha Michel preni enconuschientscha. El rinfatscha da sia vart al deputà lumnezian da nun esser stà preschent a la sesida da la suprastanza da l'uniun dal mastergn grischun per defender sia posiziun ed intimar ils commembers ad ina autra parola. «L'invitaziun ha el retschavì ad uras.»

Duas sesidas da medem temp

Blumenthal n'è betg l'emprima giada confruntà cun la reproscha da nun esser stà sez preschent a la sesida da parola da la suprastanza da l'uniun. El ha fatg attent ch'el haja stui esser preschent a la sesida da la cumissiun da gestiun dal cussegl grond sa radunada il medem mument. Sch'el fiss stà pertschert da la situaziun dispaivla entaifer la suprastanza da l'uniun avessia el dà la preferenza a lezza sesida. Blumenthal ha discurrì da blera renconuschientscha retschavida per ses segn da protest vers la parola da votaziun da l'Uniun grischuna d'artisanadi e mastergn. Ina organizaziun tenor maini da l'impressari sursilvan pli e pli fitg influenzada dad exponentes da la Partida populara. Ina reproscha che Michel renviecha categoric. El ha ditg ch'i saja la cleira finamira da cuntanscher ina represchentanza eguala davart da la politica, da las branschas e da las regiuns en la suprastanza da l'uniun tergala da la mastergnanza grischuna.